

四庫全書

子部

欽定四庫全書

唐開元占經卷八十二

唐 瞿曇悉達 撰

客星占六

客星犯石氏中官上

客星犯攝提一

郝萌曰客星入攝提座謀臣在側聖人受制 郝萌曰

客星當攝提口將受主俸不為主用 郝萌曰客星舍

攝提角不去國家有喜一曰天下必有開倉者 河圖
聖洽符曰客星出攝提若守之天下大亂人君自將兵
君臣謀兵起宮中不出其年

客星犯大角二

甘氏曰客星出大角大兵起天下亂若守之二十日以
上王者惡之國易政期三年 海中占曰客星出入大
角天下亂兵大起臣謀其主不則天下出水入城郭熱
人民期百日

郊萌曰期三十日

郊萌曰客星入中大角天角

天子之席有奇令 郝萌曰客星舍抵大角留不去國
家有大責 石氏曰他星守大角諸侯有謀上者 郝
萌曰客星守大角天下有憂 郝萌曰客星守大角太
子耗衰 郝萌曰客星入座謀臣在側聖人受制

客星犯梗河三

海中占曰客星干犯梗河天子慎邊四裔不靖 荊州
占曰有星入天矛天下兵起 陳卓曰客星入梗河天
下兵起 石氏曰黃白星出天矛天子用兵 王歷曰

客星出梗河北兵為亂侵陵中國人主有憂期二年

按司

馬天文志曰孝明帝永平四年八月辛酉客星出梗河西北指貫索七十日去梗河為北兵至五年十一月北匈奴七千騎入五原塞又入雲中至原陽也

石氏曰黃白星走天矛正中

之有軍兵罷無軍天子有獻兵者星赤兵內起大將為亂蒼白將有疾黑將死三夜不去天子多戮者

石氏

曰客星舍梗河主在東之君人民相師長强者為虎狼小民為魚肉海中占曰客星舍梗河陰陽不和天下大風樹木皆倒

天官書曰客星守天矛若出之北兵大

動有喪 石氏曰客星出入若守梗河朔兵大起

客星犯招搖四

石氏曰客星干犯招搖朔兵大來不出一年 韓楊曰

客星入招搖南夷王且操奇物來降國者 黃帝占曰

客星出招搖朔兵來一曰夷狄勝若旱多風 石氏曰

客星出招搖兵革大起朔兵為亂若單于死期一年

黃帝曰客星當天庫天下兵革 石氏曰客星當天庫

將受主命不為主用 石氏曰客星走招搖北兵來 黃

帝曰客星居招搖間北兵起

郝萌曰客星舍匈奴星

按招搖無匈奴之名郝萌曰此當以招搖主北兵以入招搖占中國兼錄之也人面龍身留十

餘日不去占主內相賊國家兵起敵人來降 石氏曰

客星守招搖北主死其民亂 石氏曰客星守招搖蠻

夷君死民亂 班固天文志曰客星守招搖蠻夷有亂

客星犯彗五

陳卓曰客星干犯彗占單于大敗期二年 黃帝占

曰客星出彗戈敵兵大敗若有死王期二年 荊州占

曰客星守亥戈天子死 石氏曰客星守亥戈北兵來

客星犯天槍六

郝萌曰客星入天槍天下有饑兵 荊州占曰客星入
天槍有大戰 石氏曰客星出天槍邊外有急機槍用
有兵起大將出期一年

客星犯天樞七

石氏曰客星干犯天樞兵大起期二年 焦延壽曰有
星入天樞大兵當起 玉歷曰客星出天樞兵大起下

謀上大人有戮者期二年

客星犯女牀八

石氏曰客星干犯女牀貴人暴誅期百八十日 郝萌

曰有星入女牀有異女來誤我王 荊州占曰客星入

女牀若動搖女有大行若天下女子有憂 甘氏曰客

星出女牀若守之強臣執政貴人有暴誅者期百八十

日 荊州占曰客星守女牀後宮女凶

客星犯七公九

河圖聖洽符曰客星出七公及守之將相有憂御臣受
戮若議人有罪直言者凶 黃帝占曰客星守七公為
饑民君不安

客星犯貫索十

石氏曰客星干犯貫索不有大赦必有大獄民叛篡弑
君不過三年 石氏曰客星入貫索天下多死人 石
氏曰他星入貫索二日有喪 荊州占曰黃星入貫索
諸侯有以地坐法者 黃帝占曰有星出貫索中有赦

星大大赦星小小赦 荊州占曰客星出貫索其國亡

土邑 齊伯曰客星入貫索大臣有謀下有反者貴人

多下獄一曰守之十日有大赦期一年

按司馬彪天文志曰孝明皇帝

永平四年八月辛酉客星出梗河西北指貫索七十日去貫索貴人之牢陵鄉侯梁松怨望懸飛書誹謗朝廷下獄死妻子家屬徙九真也

客星犯天紀十一

黃帝占曰客星入天紀有拘主 黃帝占曰客星入天

紀諸侯舉兵國政亂 甄耀度曰客星出天紀大臣執

權兵宮中人主有憂若強臣相戮期不出二年 却萌
曰客星行紀星有饑民君不安 石氏曰他星守紀星
君不安有饑民

客星犯織女十二

石氏曰客星犯織女天子女誅死 陳卓曰客星干犯
織女后族為亂貴女有誅者期三年 却萌曰客星入
織女為旱 却萌曰客星入織女貫索須女者皆等須
女主帛絮貫索主麻縷織女主布帛及五綵皆貴各守

其價十日一倍二十日再倍三十日三倍皆以四時
相執守南南方貴守北北方貴守西西方貴守東東方
貴守中中貴所守其國皆貴其餘星皆倣此 荊州占
曰奇星入織女有兵十年乃解一曰人主攻一家一國
若族之 石氏曰赤星入織女主攻一國殘之又曰接
客來黃星入女子受地者黑星入淫婦憂青星入以憂
來者 石氏曰客星入織女有女使者若中守乘犯之
女君誅若有婦女之事 石氏曰黑星出織女女子多

懷子死 海中占曰客星出織女若入之后族為亂若

誅臣一曰貴女有誅者各以五色占白為喪赤為兵黑

為水黃為旱青為饑 荊州占曰客星出織女宮人逃

一書曰
青星

黃帝占曰客星出入織女絲絮布帛貴在後

年 石氏曰客星出入

却萌
曰守

織女有誅臣降王 却萌

曰客星在織女下兵起必戰不出十日

却萌曰客星

舍織女後宮有以藥死者

石氏曰他星守織女女有

憂若有嫁娶之事

石氏曰他星守織女乍出乍入前

後左右回惑其色色青為饑赤為兵黃為旱白為喪黑
為水 郝萌曰客星守織女山搖地動若牛疾 荊州
占曰客星守織女有女子使來者色青憂以來赤有奇
客來黃白宮女有喜

客星犯天市垣十三

文曜鈞曰客星入天市垣兵大起斧鉞用大臣當有斬
者近期一年遠期三年 石氏曰客星入天市垣色黑
市使死 石氏曰客星入天市黃白市使憂黑死以日

占何國 石氏曰客星入天市聚者皆起 或不得耕

食大兵橫流期三年 石氏曰客星入天市大臣誅有

戮卿一曰有戮王昏期一年遠三年

按班固天文志曰孝宣地節元年七

月癸酉客星入天市芒炎東南指其色白是時楚王延壽謀逆自殺地節二年故將軍翟告夫人顯將軍霍禹范明友奉車霍山及諸昆弟嬪婚為侍中諸曹九卿郡守皆謀反夷族伏其辜也

郝萌曰客

星入市中兵犯外城 郝萌曰客星入天市中耀石三

百居市門者石五百五十亦曰遊市旁者石百 郝萌

曰赤星入天市棄市滿天下 郝萌曰黃白星入天市

嗇夫不遷即賜 却萌曰客星遁或若填星所發入市
中而出外死罪復生 却萌曰赤星長孛集天市中有
兵 却萌曰青黑星出天市嗇夫不死即免 司馬彪
天文志曰孝靈中平五年六月丁卯客星如三升椀出
貫索西南南行入天市至尾占曰為貴人喪明年四月
宮車晏駕 謝承後漢書曰吳郡周敞師事京房房為
石顯所譖繫獄謂敞曰吾死後三十日客星必出天市
即吾無辜也後果如言敞上書陳其枉 荊州占曰客

星出入天市旗兵大起大將斬 玄冥曰客星出天市

執令者死大臣誅有貴人多市死者期二年 郝萌曰

客星入若守天市執令者死 郝萌曰太白星入若守

天市天下亂 郝萌曰太白星入若守天市度量不平

市亂

客星犯帝座十四

石氏曰客星干犯帝座人民大亂官朝徙大臣期三年

荊州占曰客星入帝座留不去則有貴人變更令

荆州占曰赤星入帝座朝廷有兵 河圖帝覽嬉曰客星出帝座若守之不去則有貴人變更法令大臣為亂人主不安

客星犯天候十五

荆州占曰客星入天候星士卒罷人有急行 石氏曰客星出候星天下亂人民相攻士卒出有急行 石氏曰客星守候星候者憂 石氏曰客星守候星外客欲為主也 荆州占曰客星守候星天下大亂

客星犯宦者十六

石氏曰客星干犯宦者宦者滅亡 却萌曰客星舍宦者星左右貴人有不長者 玉厯曰客星出守宦者星左右貴人有不廢者不能守其貴一曰有讓位者

客星犯宗人十七

河圖聖洽符曰客星出宗人帝族親多死者一曰王者不親宗族 却萌曰客星舍宗人留不去有貴人死者

客星犯宗正十八

荊州占曰客星守宗正更號令 甘氏曰客星出宗正
守之不去左右宗族羣臣多死不出其年

客星犯宗星十九

聖治符曰客星出宗星帝族親多死者一曰王者不親
宗族 石氏曰客星守宗星宗人不和

客星犯東西咸二十

齊伯曰客星出東西咸女主自恣若淫佚一曰貴人女
有憂若有黜者不出其年 荊州占曰客星守東西咸

人主淫佚失道

客星犯天江二十一

黃帝占曰客星入天江河津關絕道不通一曰河津吏有憂甄曜度曰客星出天江有大水河海溢津關塞民多饑陳卓曰客星干歷天江大兵攻王國王者以赦除之則國豐年黃帝占曰客星守天江星一曰津河吏有憂

客星犯建星二十二

陳卓曰客星干犯建星王失道忠言者誅賢士逃亡

海中占曰客星入建星

郝萌曰守

有意福穀大熟

郝萌曰

客星入建星君不親其大臣

郝萌曰赤星入建星人

主謀兵兵罷出建星軍乃戰

郝萌曰赤星入建星津

河水大出橋梁不通

海中占曰客星出建星君不親

其大臣上下相疑主令不行

郝萌曰客星舍建星留

不去即有大兵馬大貴

郝萌曰客星守建星人民安

郝萌曰客星入守建星人臣自臨府事

玄冥曰客

星中而守之天下道塞多有盜賊關梁不通期二年

客星犯天弁二十三

文曜鉤曰客星出天弁若守之有囚徒兵起一曰五穀傷大貴

客星犯河鼓二十四

黃帝占曰客星入河鼓色赤有兵黃則天下安蒼則不用
却萌曰有星入河鼓有兵三軍出之野 却萌曰

大星入河鼓有兵三將軍出 却萌曰大星入河鼓天

下鼓出 郝萌曰大赤星入河鼓星大將驚蒼黑憂黃
更地黑入之死 荊州占曰客星入河鼓兵吏驚 黃
帝占曰客星出河鼓兵出入河鼓兵入 巫咸曰客星
出河鼓旗鼓大用有兵起將軍立旗幟一曰穀貴軍絕
糧不出其年 石氏曰大赤星若出河鼓所守之國將
驚若受令出 郝萌曰客星舍河鼓中國有鐘鼓之音
若立旗幟 石氏曰客星守河鼓三將軍食絕 郝萌
曰客星守河鼓將軍戰亡有奪鼓者 荊州占曰客星守

河鼓兵革起旗鼓用 黃帝占曰客星中犯乘守河鼓
所中犯者誅若有罪

客星犯離珠二十五

荊州占曰客星犯離珠後宮凶 王歷曰客星出離珠
若守之後宮凶若宮人有罪誅者期二年

客星犯氐爪二十六

石氏曰客星干犯氐爪政亂近臣相譖宮有戮死者以
赦除咎 黃帝占曰客星入氐爪有大憂若魚鹽價十

倍 石氏曰客星色青入艸瓜諸侯有來獻果者中有

藥不可食 石氏曰客星色赤入艸瓜人主攻一邑族

之 石氏曰客星色白入艸瓜有喪 石氏曰有星色

黑入艸瓜中若外皆為魚鹽貴出艸瓜君使人賜諸侯

果 黃帝占曰客星色赤出艸瓜天下有遊兵而不戰

黃帝占曰客星白

一本白色青也

出艸瓜君使人遺諸侯果

甘氏曰客星出艸瓜人主憂備毒藥若諸侯獻果中

有藥不可食防備之若食憂期三年 黃帝占曰有星

出入匏瓜若在其下皆為食官有憂 黃帝占曰客
星守匏瓜山搖 黃帝占曰有星守匏瓜有食有憂
石氏曰客星守匏瓜山谷多水 黃帝占曰客星入若
守匏瓜備奸人獻食物有毒藥也

客星犯天津二十七

石氏曰客星干犯天津賊斷王道 黃帝占曰客星入
天津中若守之津河道不通 聖洽符曰客星出天津
天下關絕不通若津吏有憂罪者 郊誦曰客星入天

津諸侯不通天下備道修橋梁 却萌曰客星入河中
貴人有溺死者 却萌曰客星守天津水道不通若船
貴一曰津河吏有憂 荊州占曰客星守天津津不可
渡 石氏曰他星守犯天津津河為敗

客星犯螣蛇二十八

荊州占曰客星守螣蛇水雨為災 石氏曰他星守犯
螣蛇水物不成水蟲為敗

客星犯王良二十九

郝萌曰客星入王良將士皆亡 甄曜度曰客星出王
良天下有急關津不通兵起若馬多死期二年 石氏
曰客星守王良津河不通 郝萌曰客星守王良天下
有急馬大動一曰疾病 郝萌曰赤星守王良兵起一
曰守王良天下大水橋梁不通 海中占曰客星入王
良而守之天下兵起車騎行人主憂將軍有死者期三
年

客星犯閣道三十

陳卓曰客星干犯閭道王者居正殿不私行則災自消
玄冥曰客星出閭道有驚戒之事若道中有伏兵人
主備左右慎女兵

客星犯附路三十一

陳卓曰客星干犯附路道不通天下半隔期一年焦
延壽曰有星入附路兵大起却萌曰有星入附路馬
賤巫咸曰客星出附路若守之太僕有憂若以馬罪
一曰馬當賤期不出一年

客星犯天將軍三十二

河圖帝覽嬉曰客星出將軍將軍有憂若黜者若軍吏不忠有過罪者 石氏曰有星守天將軍大將軍有憂一曰軍吏不安以饑為敗

客星犯大陵三十三

荊州占曰客星入大陵若守之君有大陵功之令 黃帝占曰客星出大陵有土功墳陵之事若犯積尸國有大喪人主當之期三年 石氏曰他星若入守大陵有

土功事

客星犯天船三十四

郗萌曰客星入天船水大至 石氏曰客星出天船天
下大水舟船用若有船事期不出年 郗萌曰客星守
天船有兵一曰王船有事不出一年

客星犯卷舌三十五

玉歷曰客星出卷舌若守之天下有妄言惑其君者君
信讒臣罪無辜者

按班固天文志曰元帝二年五月客星見昴分居卷舌東可五尺青白色

炎長三寸其年十二月鉅鹿都尉謝君男詐為神人論
死父免官 孟康注曰姓謝名君男兒也不紀其名直
言男
者也

客星犯五車三十六

石氏曰客星干犯五車兵滿野天下半傾百姓徙居去
其土期三年 黃帝占曰客星入五車色黃人主受賀
色白言義色赤言兵色青言憂色黑大人當之 海中
占曰客星入五車所守土穀貴 郝萌曰客星入五車
糴倍價一曰車倍價皆為後年 郝萌曰客星入五車

為赦 荊州占曰客星入五車人相食若大水溝瀆溢
黃帝占曰有星出五車色白君使人諸侯以車為戒
色黃受賀赤言兵車騎滿路色黑多死者以其日占期
却萌曰客星出五車兵出入五車兵入 玄冥曰客
星出五車天下兵起車騎滿野將相有憂五穀大貴人
民饑期百八十日中一年遠三年 却萌曰客星出入
五車以守五車可取者客星出入黃車取黃出入麥車
取麥出入豆車取豆出入黍粟車取黍粟出入稻米車取

稻米出以其行為粟其出入中行石二百出入外行石百錢
黃帝占曰客星守五格休左者軍大發守休右留十日天下有喪大亂
郗萌曰客星守五車兵革起海中占曰客星入五車犯守之大人有憂車騎發用將軍出令國易政期三年

客星犯天關三十七

黃帝占曰客星入天關諸侯不通民多相攻且有兵子伐父弟伐兄是謂不理各去其鄉
郗萌曰客星入天

關民多疾病 却萌曰有星入天關天下有急一曰關
市不通 荊州占曰客星入天關多盜賊道路不通
石氏曰他星入天關兵戰不勝 石氏曰客星出天關
門天下起兵不戰 孝經章句曰客星守天關羊馬牛
大貴不出三年有德令 荊州占曰客星守天關諸侯
不通期十二日又曰民饑又有自賣者

客星犯南河界三十八

石氏曰客星出南河界有男喪事於外入南河界有男

喪事於內 石氏曰客星出南河有喪事於外皆為男

喪暈三重必有降城 一曰客星干犯兩界間天子出走

大臣執威王者以赦除咎羣臣尊負天子以寡 黃帝

占曰客星守南河界有水 荊州占曰客星守南河界

民多溫病 齊伯曰客星出南河若守之蠻夷兵道不

通 一曰入南河界為旱災天下大饑期二年 郝萌曰

客星行南河界中若守之皆為旱 郝萌曰客星入北

河界從東入九十日有兵從西入六十日有喪 郝萌

曰客星他所來入北河界間諸侯有奸甄曜度曰客星出北河朔兵動關道塞其國有憂一曰入北河為水饑期一年黃帝占曰北河界多客星朔兵起郄萌曰北河界下多小星者民不治將不明多有失職郄萌曰客星若赤星守北河界臣賊主一曰大臣誅荆州占曰客星守北河界后有乳疾郄萌曰客星見南北河界間奸人在中帝覽嬉曰大客星居兩界間天下有難道在天門中邦家不通

客星犯五諸侯三十九

石氏曰客星干犯五諸侯王室大亂兵起天子宗廟不
祀海中占曰客星出五諸侯大臣有憂若執法者有
罪一曰議臣有黜者 却萌曰客星守五諸侯天下大
亂 却萌曰客星守五諸侯天子親屬失位大水行五
穀大貴天下民多死於道旁者秦國尤甚 荊州占曰
客星守五諸侯諸侯亡地一曰諸侯有憂秦國受重殃
客星犯積水四十

石氏曰客星干犯積水兵起宮門宗廟毀絕大臣有憂
巫咸曰客星出積水天下大水溝渠溢有攻隄防之
事期不出年

客星犯積薪四十一

石氏曰客星干犯積薪有亂臣在宗廟 石氏曰客星
出積薪有憂若以薪蒿之事而致罪者


客星犯水位四十二

石氏曰客星干犯水位水道不通伏兵在水中以水為

害 荊州占曰客星守水位而川流溢 玉歷曰客星

出水位天下以水為令法官有憂若臣下有謀兵起期

三年



唐開元占經卷八十二

欽定四庫全書

子部

唐開元占經卷八十三

四

詳校官中書_臣李杲

靈臺郎_臣倪廷梅覆勘

總校官編修_臣王燕緒

校對官中書_臣王慶長

謄錄監生_臣錢雋選

欽定四庫全書

唐開元占經卷八十三

唐

瞿曇悉達

撰

客星占七

客星犯石氏中官下

客星犯軒轅四十三

石氏曰客星干犯軒轅近者誅滅宗族王者以赦除咎

按司馬彪天文志曰孝明帝永平十四年正月戊子客星出昴六十日在軒轅右角稍滅軒轅右角為貴相昴為

獄事客星守之為大獄是時方楚事未竟
司徒虞延與楚王英黨與交皆伏誅也

却萌曰有

星入軒轅有遠來者 却萌曰有星入東陵有夷從外

來降者 却萌曰客星入軒轅有女子惑天子者 荆

州占曰客星入軒轅美人有經死者 焦延壽曰青黑

星出入軒轅皆為諸夫人有子不成 司馬彪天文志

曰客星出軒轅後宮失勢 却萌曰客星舍軒轅之旁

美人有懸死者 荊州占曰客星守軒轅獄中有女子

飲藥死者 却萌曰客星守軒轅女主不安一曰有憂

洛書甄曜度曰客星出軒轅若守之各隨其所守后

妃嬪夫人近者當之一曰守之三日美人有經者

按司馬彪

天文志曰孝和永元十三年十一月乙丑軒轅第四星間出客星色青黃軒轅為後宮星出之為失勢其十四年

六月辛卯陰皇后廢

石氏曰客星出軒轅若犯守之發五將之

兵 石氏曰他星守軒轅所起者有憂 齊伯曰客星

犯守軒轅大星女主逆天子若女主與傍人通宜防之

客星犯少微四十四

石氏曰客星干犯少微白衣聚者凶術士不顯智者逃

亡期三年 郝萌曰有星入少微奸臣亂 石氏曰客星出少微道術士用功者隨其能王者用之 郝萌曰客星守少微處士憂 黃帝占曰客星入中犯乘守少微宰相易又曰女主有憂 石氏曰客星入中犯乘守少微五官亂宰相有憂

客星犯太微四十五

郝萌曰客星中犯左右執法左右執法誅若有罪 黃帝占曰客星入端門出西門天下大水民人饑 石氏

曰客星入端門其國有臣謀 石氏曰客星入端門出
東門天下大旱五穀不成 甘氏曰客星入端門仍出
端門其國有大患天下大亂易主以色占出左掖門其
國有憂出東門其國旱出左掖門其國大亂出西門其
國大水 却萌曰有星入端門賊鈔主稱王命 石氏
曰客星入左掖門出右掖門其國有喪 石氏曰客星
入右掖門其國有客 石氏曰客星入左右門出東西
門國有大喪貴臣有死者 甘氏曰客星入太微右掖

門出端門小國亡出左掖門其國有小事出東門其國
大亡仍出右掖門其國有客為刑事出西門大國以微
亡 荊州占曰客星入左掖門出端門其國滅亡仍出
左掖門其國大傷出東門其國大喪出右掖門其國大
逆無道出西門其國流血百里 石氏曰客星入東西
門出左右掖門其國有兵軍有出者幸臣有憂皆不出
一年 甘氏曰客星入東門出端門其國有憂出左掖
門其國所作不成仍出東門其國有臣結謀出右掖門

其國大亡出西門其國有殃 荊州占曰客星入東門

出東門其國有大喪 黃帝占曰客星入西門出東門

其邦兵起臣謀主入東門出西門大國微亡守之不去

楚國凶殃 甘氏曰客星入西門出端門其國大亂出

左掖門其國不為用出東門其國不祥出右掖門其國

大敗仍出西門其國有兵 郝萌曰客星入西門出端

門一書云出左掖門其國大不熟 郝萌曰客星入太微西門

出東門有憂喪 郝萌曰他星入太陰門後宮有賊

荊州占曰客星入太陰西門出太陰東門其國大水天

下大亂 荊州占曰他星入太陰門兵起動天下 荊

州占曰客星入西門出西門其國有兵謀 陳卓曰客

星入太微帝宗后族為亂亡社稷 河圖帝覽嬉曰

客星入太微廷中出端門天下大亂王者憂國易政期

三年

按河法盛中興書曰晉安帝元興元年十月有客星色白如粉絮出太微垣西至十二月入太微占

曰兵入天子庭二年十二月桓玄肆逆放帝后於尋陽

石氏曰他星入太微色

白而澤者赦 石氏曰客星入太微宮二旬若三旬有

小赦期六月 石氏曰他星入四輔臣為亂 海中占

曰客星入太微中火大起有客賊來入國守之十日不
去其災成在陽為男主在陰為女主不出四十日 却

萌曰赤黃星狀如帚入太微婦女喜出太微天子賜諸

侯美女 却萌曰客星入天子宫丞相憂疾 却萌曰

客星入天子宫十日而成鈞已天下有大赦奴婢下賤

人妻妾長庸期三月若六月 荊州占曰客星入太微

宮中一旬宮中有自然者期四十日在陽為男在陰為

女陽黃座南也陰黃座北也入二旬有赦期六月 荆

州占曰青星入太微有客來 荊州占曰星正赤入太

微中兵起 陳卓曰星正赤入太微中廟有兵 荊州

占曰赤黃星潤澤入太微中天子有喜以其所抵率言

抵座星也如劍者男子喜 荊州占曰客星入太微庭

中有一星天子出將兵有二星天下無處主有三星天

下散亡 荊州占曰客星入太微所中乘守者有殃

玄冥占曰客星入太微庭中帝宗后族為亂欲謀殺主

宮門有伏兵期三月 天官書曰客星出天庭有奇令

荊州占曰赤星出庭中有立王若徙王又曰火起

荊州占曰赤黃星出太微中天子用金錢賜諸侯王

荊州占曰星黃如獸出太微中天子用畜賜諸侯王一

曰氣類獸及蜚昏客喜也 荊州占曰有星如拳正圓

出太微中天子用璧玉賜諸侯王 陳卓曰客星出太

微有兵喪

按宋書天文志曰魏文帝黃初三年九月甲辰客星見太微左掖門內十月孫權叛命帝

自南征前驅臨江破其將呂范等是後累有征後七年五月文帝崩甘露四年十月丁丑客星又見太微中轉

東南行歷軫宿積七日
減景元元年高貴被害

黃帝占曰凡客星出入太微

各以其日占知州國所出皆不出百日中一年遠三年

灾必應 黃帝占曰客星出入太微人主有憂大臣為

謀有反者兵起宮中一曰執政臣有戮者期一年 海

中占曰客星入太微天下大亂兵大起臣謀其主不則

天下大水入城郭煞人民

却萌曰期三十日

荊州占曰客星

出入太微大水入城傷人民期三十日 荊州占曰客

星舍太微宮天下有聖女子在燕代 荊州占曰客星

舍太微南蕃留不去魯有謀者舍西蕃留不去王者泄

妖言在楚國 却萌曰客星中太微宮者不出三十日

一本云三日也必有大赦 黃帝占曰客星守太微東蕃若西

蕃將相星者皆為人君有憂 石氏曰客星守太微宮

臣煞主 玉歷曰客星出太微犯守將相左右執法隨

其所守犯皆有誅期二年 甘氏曰太微中有一客星

天子自將兵有二客星天下亂民散走有三客星天下

大亂守之三十日君死國亡期三年遠五年

客星犯黃帝座四十六

文曜鈞曰客星入太微犯黃帝座天子有憂臣謀主至座而還謀不成反受其殃守犯三十日已上臣謀成期不出一年 荊州占曰客星舍五帝座有聖人與君並

治在蜀秦

石氏曰蒼白星抵座天子有喪憂抵座旁

臣有反之者

按幽明錄曰漢武帝常微行過主人家家有婢國色帝悅焉仍留宿夜與婢臥有書

生亦家宿善天文忽見客星移掩帝座甚逼書生大驚懼連呼咄咄不覺聲高仍見一男子操刀將欲入戶聞書生聲急謂為已故遂縮走客星應時即退帝聞其聲異而召問之書生具說所見乃悟曰此人是婢婿將欲

肆其凶於朕乃召羽林語主人曰朕天子也於是擒叔而伏誅厚賜書生後漢書曰嚴遵字子陵會稽餘姚人世祖為書生時與遵遊學及即位見遵遵長揖不拜上留遵俱寢遵以足加世祖其夜客星犯天子宿明晨太史奏其異詔曰朕友人嚴遵與朕俱臥之耳石氏曰有赤星銳如劍抵座

星天子以兵驚一曰災驚 荆州占曰黑星抵座左右

旁大臣有死者 荆州占曰黃白星大如拳正圓抵座

旁者臣有獻美人者 却萌曰黑星抵留座星者曰天

子惡之

客星犯四帝四十七

巫咸曰客星犯四帝輔臣有亂若有反一曰若左右輔臣有謀期百八十日

客星犯屏星四十八

石氏曰客星有中犯乘守屏星者為君臣失禮而輔臣有誅者若免罷去

客星犯卽位四十九

陳卓曰客星干犯卽位大臣失勢黃帝占曰客星入卽位大臣為亂石氏曰客星入卽位多死者荊州

占曰赤星入即位兵起若大憂出即位多用兵遠出者
荊州占曰黑星入即位多有罪者 荊州占曰蒼白
星入即位有亂者 荊州占曰蒼白黑星出即位多死
者 玉歷曰客星出即位守衛臣有謀者人主有憂將
相有誅者一曰外夷有反者期二年 荊州占曰客星
入中郎位大臣為亂戒左右 黃帝占曰客星守即位
元士有憂又曰名官位不死必去 荊州占曰客星守
即位其將憂也

客星犯郎將五十

黃帝占曰有星入郎將色青黑嗇夫不死則免黃則遷
白則受賜 荊州占曰有星入郎將大臣亂政不行

石氏曰客星守郎將大臣為亂 甘氏曰客星出郎將
輔臣有誅將相有罪若有黜者期一年 甘氏曰客星
入犯守郎將將誅

客星犯常陳五十一

石氏曰他星犯常陳王者誅之近期百八十日遠期三

年 聖洽符曰客星出常陳守衛者有誅若左右兵起王者有憂期不出年

客星犯三台五十二

石氏曰黃白星入三能貴人有賜爵者蒼星出三能貴

人奪爵

按司馬彪天文志曰孝安永安四年六月甲子客星大如李蒼白芒氣長二尺西南指上階星

降太尉張瑀司空張敏皆免官也

郗萌曰有星出三能爵令行 郗

萌曰客星舍三能左右羣臣有不正者露當降也 郗

萌曰客星舍三能留十餘日不去王侯有不通者深渠

當修城郭決此三台之過也 黃帝占曰客星入三台
若守之大臣多戮若貴人多病瘡死者 帝覽孛曰客
星出三台若守之主誅大臣貴人有死者不出百八十
日 却萌曰客星守天柱大人戒左右趣治兵弩 却
萌曰他星犯守三台有兵喪一曰水為災害 石氏曰
有星入司命色蒼民憂喪事白潤澤婦女多傷黑嬰兒
死 甘氏曰有星入司命近臣抵罪者色青有憂黃白
無故黑死 石氏曰蒼星出司命王者病死 甘氏曰

青若黑星入司命中奸人有出者 石氏曰有星入司
祿大臣爭榮 甘氏曰有星入司祿色黃若白近臣有
易爵者出司祿色青近臣有抵罪而走者黑則死

客星犯相星五十三

陳卓曰客星干犯相星輔相憂不出一年天下變更其
令民多移徙

客星犯天牢五十四

黃帝占曰有星入天牢斧鑕用諸侯有獻地者出天牢

王賜諸侯地色青皆以兵黃白皆以好一曰星出南為
獻地 海中占曰客星入天獄有德令 郊萌曰有大

星入天牢有赦期二十日 郊萌曰客星入天牢必有

戮卿 荊州占曰客星入天牢貴人有繫者有戮君

荊州占曰客星入天牢其國得邑土出天牢為亡邑土

也 石氏曰有奇星守天牢二十日已上天下大赦

石氏曰客星守天牢一年大魚死一曰人相食 荊州

占曰客星守天牢鉞鉞用以其初守日占國 巫咸曰

客星出天牢若守之有貴臣多下獄者期不出一年

却萌曰常以五子日候天牢中有變星期不出十日赦

客星犯文昌五十五

石氏曰客星干犯文昌則附臣受殃近期三年遠期六

年 韓楊曰客星入文昌有女子惑天子者 文曜鉤

曰客星出文昌其國失政人主有憂臣受其殃 石氏

曰客星出文昌其國失君政 石氏曰客星守文昌有

兵君不安 黃帝占曰有星入將星色蒼將有憂一曰

故臣有抵罪 黃帝占曰黃星入將星受封黑將死

黃帝占曰大赤星入將星提鼓之將驚 黃帝占曰有

星入相星色黃若白皆為故臣有賜爵者 荊州占曰

有星入司命中色蒼廷臣有憂黃故臣有賜爵者白近

臣有抵罪者黑近臣死出司命色赤王者疾困 黃帝

占曰客星出司命司中司祿近臣抵罪走者色黃白無

故青憂黑死 郊萌曰客星出司命有加命於羣生一

曰有下命者 石氏曰有星入司命中為內亂 黃帝

占曰有星入司命中色蒼近臣有憂一曰近臣有棄捐者 荊州占曰有星入司中色蒼者有賊 却萌曰青黑星若入司中奸人有入者出司中奸人有出者 石氏曰有星入司祿中色黃若白近臣有賜爵者 却萌曰客星入司祿色青黑近臣有奪爵者 却萌曰客星出司祿有下賞者

客星犯北斗五十六

却萌曰客星入北斗魁上若下色青黑人主大憂亦有

大客境外與中國爭兵黃白人主有賀期皆六十日若
百二十日人主避舍東方十日而賜功應之 郝萌曰
有星入北斗魁中大人有繫者一曰人主左右有囚者
色黃白無故色青黑有憂死不出色赤斬 荊州占曰
有星出庭入北斗魁中二千石有繫者色青憂黑死赤
有斬事 荊州占曰大星入北斗貴臣誅若繫者 黃
帝占曰客星出北斗魁中天子自將兵國憂傾危社稷
不安民多苦期一年 石氏曰有星集北斗旁不入北

斗中名貴人有憂以五色占之 却萌曰有星出北斗

魁天下赦星大赦大星小赦小期九十日當至 齊伯

曰客星出北斗旗間兵大起車騎行若貴臣有誅人主

憂旗者紫宮北斗兩間 海中占曰客星出入北斗天

下大亂兵大起臣謀主不則天下大水入城郭煞人民

期百日

却萌曰期三十日也

却萌曰有星離北斗柄中央色青

相有憂赤者兵事黃白有赦若相遇賊黑者死 甘氏

曰客星見北斗魁中色赤楚當之青齊當之黃衛當之

黑燕當之白秦當之各以五色知其分野吉凶 荊州

占曰有星見北斗魁中有死者色赤楚君當之 荊州

占曰變星見北斗魁中天子當之 石氏曰大星去北

斗中如赤鳥其頭黑天下有兵 甄曜度曰客星居北

斗旁帝主有憂若有不出者兵大起士卒用各以五色

占去北斗一尺期一年二尺期二年 郝萌曰客星守

北斗天下必有大事若大變守斗後道不通水 郝萌

曰客星守北斗七星人君大變

一書云有憂

荊州占曰有

星入正星大人遇賊出正星為政者易 荊州占曰有

星抵正星有容色青以禽獸為幣黃以綾羅為幣赤以
錢為幣白以人若兵劍為幣黑以金為幣色白蒼以羊
為幣正星上左右以馬牛魚鹽為幣色黑左右以五穀
為幣 荊州占曰有星出法星若入法星主當之 郊

萌曰有星入令星執法者死出令星執法者逐於諸侯

荊州占曰有星入伐者蠻夷以水兵至出伐星天子

與蠻夷和 荊州占曰有星抵伐星而舍之者人多死

荊州占曰有星抵伐星有光女主疾有光而環伐星
君疾 却萌曰有星入煞星大臣主馬者死期一旬出
煞星大臣走 荊州占曰有星入危星易政出危星天
子出令不行 荊州占曰有星入部星諸侯兵起子攻
父弟攻兄 却萌曰客星入輔星有善令 荊州占曰
有星入輔星色青相有罪若免色赤相受兵若將兵黃
白相有賜若有喜黑相死若免

客星犯紫微宮五十七

玉歷曰客星犯紫微宮有大喪若守之十日已上災必

應期百二十日

按洪範天文星辰變占曰漢昭元鳳四年九月客星在紫微宮中樞極間後三

年昭帝崩也

石氏曰客星入紫微宮天子有急兵起宮中

必有死王若有逃走之主期不出百八十日

按班固天文志曰宣

帝黃龍元年三月客星居王良東廣可九尺長丈餘西指出閣道間至紫宮其十二月宮車晏駕司馬彪天文志曰孝章元和元年四月丁巳客星晨出東方在胃八度長三尺歷閣道入紫宮留四十日滅閣道紫宮天子之宮也客星犯謂之大喪後四年章帝崩宋書天文志曰晉太康元年四月客星在紫宮太康末武帝耽晏遊多疾病是月乙酉帝崩永平元年賈后誅楊駿及其黨與皆夷三族楊太后亦見煞是年又誅汝南王亮太保

衛瓘楚王偉海西太和四年二月客星見紫宮西垣至七月乃滅六年桓溫廢帝也

荊州占曰

客星入紫微宮國有大變一曰為兵起得地

按班固天文志曰孝

昭元鳳四年九月客星去紫微宮中樞極間其五年六月發三輔郡國少年濟北軍也

荊州占

曰赤星入紫宮天下亂一曰為天下無人其中列大夫

多死罪者入其旁有亂臣 荊州占曰黃星入紫宮人

主益地天下有喜期十日 荊州占曰有赤星若黑星

入紫宮從其陽入有客兵期六十日至從其陰入有走

王 黃帝占曰客星出紫宮天下大亂臣煞其主王者

有憂國有大變期不出年 石氏曰有星如拳正圓及
如獸狀出紫宮天子用璧玉賜諸侯王 石氏曰客星
守紫宮臣煞主 荊州占曰客星在旗間車騎起

客星犯北極勾陳五十八

石氏曰客星入北極天下道塞 黃帝占曰客星出北
辰天子出德令安天下 黃帝占曰赤星出天樞天下
兵盈野罷 郊萌曰客星出北極而所之國大敗四方
皆然 石氏曰他星見北極帝王驚宗室亂王者修郊

祀奉宗廟大赦天下則災消 荊州占曰客星舍極四

夷若胡王有喪 荊州占曰客星守極大臣誅 荊州

占曰客星

一本云赤星

守天樞極兵聚一國有更君易幣

石氏曰客星守天樞國有大憂 石氏曰客星出北辰

犯守大星天下道塞兵大起臣欲謀主兵聚一國人主

有變期不出年 黃帝占曰客星犯乘守北辰主星大

人當之一曰有大喪一曰有反者 荊州占曰客星犯

乘守太子星太子有罪若死 荊州占曰客星中犯乘

守庶子星庶子有罪若死 石氏曰赤星入勾陳兵內
亂大司馬戮死出勾陳大戰有功 石氏曰黑星入勾
陳大司馬溺軍中 石氏曰黃白星入勾陳將不戰兵
去外罷 石氏曰蒼白星入勾陳大司馬有喪出勾陳
軍破將有憂 荊州占曰赤星入勾陳必有迫劫主者
荊州占曰客星入正妃國有大憂 陳卓曰客星入
正妃有大喪 荊州占曰客星入黃龍之位有黜妃臣
煞主 齊伯曰客星出勾陳國有大變后妃有憂若女

主有黜者不出一年 石氏曰客星入勾陳若犯之宮
中有變臣殺其主王者有憂

客星犯天一太一五十九

荊州占曰客星入天一一座五穀大貴 甄曜度曰客星

出天一太一五穀貴人民饑一曰若有旱災 黃帝占

曰他星歷天一則宮門閉王者內不安近臣亂不出三

年

唐開元占經卷八十三

欽定四庫全書

唐開元占經卷八十四

唐 瞿曇悉達 撰

客星占八

客星犯石氏外官

客星犯天庫樓一

黃帝占曰客星入天庫以饑兵起 石氏曰客星入天

庫羅大貴為後年 天官書曰客星入天庫邊郡之兵

起此為外夷之事

郝萌曰客星犯天庫五穀大貴入

庫中糶石百處其旁石五十

郝萌曰客星入天庫牛

馬有行

郝萌曰客星入天庫兵起十年亂

荊州占

曰客星入天庫有兵發行

黃帝占曰客星出庫樓兵

車用若守之邊兵大起庫兵出車騎行期二年遠三年

荊州占曰客星入若守之天庫外夷兵起一曰官兵

憂黃帝占曰客星入若乘守天庫兵車出用

客星犯南門二

石氏曰客星出南門若守之關梁塞道路不通人民憂

石氏曰南門中有小星三芒者則兵車出 司馬彪

天文志曰孝靈中平二年十月癸亥客星出南門中大如半筵五色熹怒稍小至後年六月乃消占曰為兵至六年司隸校尉袁紹誅滅中官大將軍部曲將吳匡攻煞車騎將軍何苗死者合數千人

客星犯平星三

石氏曰客星出平星賦斂之臣憂而有過罪者若庫吏

不忠當有廢出期不出一年

客星犯騎官四

石氏曰他星入騎官有喜 玉歷曰客星出騎官星若
守之有兵起將軍有出者 石氏曰客星守騎官將出
有憂 荊州占曰客星守騎官士卒發用

客星犯積卒五

石氏曰他星守積卒主兵臣誅 石氏曰客星出守積
卒兵士為亂近臣有誅士卒多死

客星犯龜星六

邴萌曰客星入龜星小憂無傷也又曰天下大倉發

甘氏曰客星出龜星珠玉貴寶物不入若守之君臣不和上下乖離

客星犯傳說七

聖治符曰客星守傳說王者後宮少子孫若有絕後者

客星犯魚星八

齊伯曰客星出魚星鹽魚貴再倍若守之搖動大貴五

倍一曰有大水期不出一年

客星犯杵星九

甄曜度曰客星出杵星而守之天下兵起有稅米粟之事

客星犯鰲星十

黃帝占曰客星守鰲星有白衣之會 石氏曰有星入鰲星有水令 海中占曰客星出守鰲星有白衣之衆聚若天下有水水物不成期百八十日遠一年

客星犯九坎十一

郝萌曰有星入九坎天下有憂 玄冥曰客星出九坎
有水旱之災出陽則旱出陰則水

客星犯敗白十二

文曜鉤曰客星守敗白天下兵起有軍糧之急米粟之
憂期二年 石氏曰他星守敗白以饑兵起

客星犯羽林十三

郝萌曰客星守羽林若天陣兵大起 郝萌曰客星守

天陣將兵吏憂 郗萌曰赤星守羽林二十日臣弑主
郗萌曰客星入壘壁有兵 石氏曰黃白星入天軍
南天子立后 巫咸曰客星出羽林兵大起有亡國若
守之久將軍有謀主者有憂期不出三年

客星犯北落十四

石氏曰黃白星入北落天子有喜 石氏曰黃星出北
落天子使出 石氏曰赤星出北落中兵起 石氏曰
客星出北落邊夷虜兵起來入關塞若關吏有憂 郗

萌曰客星中犯乘守若北落星鬬光芒相及者為兵覆
軍煞大將

客星犯土司空十五

荊州占曰客星入土司空多土功男不得耕女不得織
天下大疾 韓楊曰客星入土司空有土徭之事 玉
歷曰客星出土司空外臣有憂夷狄兵起若土功之事
人民饑苦多病 却萌曰客星守土司空宮有土功若
哭泣之事 石氏曰客星入守土司空旱

客星犯天倉十六

黃帝占曰客星入天倉糴石一千五百穀如玉 却萌

曰客星入天倉糴石千歲大饑五穀如金玉能有穀為

君卿 却萌曰客星入天倉匈奴王且操奇物來進中

國 却萌曰周伯星流入天倉糴賤以春入夏賤以夏

入秋賤秋入冬賤冬入春賤 却萌曰老人星流入天

倉糴大貴春入夏貴夏入秋貴秋入冬貴冬入春貴

石氏曰客星入天倉粟發出兵滿野期三年 黃帝占

曰客星出入天倉有發粟之事出之有出粟入之有入粟不出其年必有兵 郗萌曰客星在天倉天下貧倉粟出 黃帝占曰客星當天倉戶將吏受主俸不為主用 石氏曰客星守天倉馬大貴 郗萌曰客星入若守天倉有兵道不通

客星犯天囷十七

郗萌曰客星入天囷匈奴且操奇物來進中國 齊伯曰客星出天囷若守之天下大旱民饑人相食若有粟

令期二年

客星犯天廩十八

石氏曰有星入天廩中色青天下多憂赤大旱有火黃
白歲熟 甘氏曰客星出天廩天下粟貴民以饑流亡
去其鄉粟當出廩期一年遠二年 石氏曰客星守天
廩馬大貴 石氏曰他星犯天廩天下亂 郝萌曰客
星守天廩粟發用

客星犯天苑十九

却萌曰客星入天苑畜多傷 荊州占曰客星入天苑

禽獸多死 玉歷曰客星守天苑畜物不孳禽獸多死

以馬起兵邊賊入境一曰牧馬多死期三年 石氏曰

他星犯守天苑兵起馬死

按司馬彪天文志曰孝順陽嘉元年閏月戊子客星氣白

廣二尺長五尺起天苑西南東北指歷天苑抵參伐天苑主馬牛為外軍色白為兵是時燉煌太守徐由使疏

勒王磐等二萬人入於關界虜獲斬首三百餘級烏桓校尉耿舉使烏桓親僕都尉戎朱魔等出塞抄鮮卑斬

首獲生口財物鮮卑怨恨抄遼東代郡殺傷吏民是後西戎北狄為寇害以馬牛起兵馬牛亦死傷於兵中十

餘年乃息也

客星犯參旗二十

郗萌曰客星入天宮天下有變弓弩皆張 黃帝占曰
星出入天弓必有削主 河圖聖洽符曰客星出守參
旗天下兵起大將軍行出弓弩用人主憂期百八十日
遠期一年 石氏曰客星守參負海不安兵起

客星犯玉井二十一

黃帝占曰客星入玉井中者皆為強國失地出玉井強
國得地 郗萌曰客星入玉井天下有喪 荊州占曰

客星出玉井將出 齊伯曰客星出玉井其軍已出為
憂若有水敗若入守之三日其歲大水

客星犯屏星二十二

石氏曰客星入天屏四足大疾 海中占曰客星出天
屏輔臣有憂若人民多疾病四足畜多死 石氏曰客
星出入天屏大人疾主污辱 郊萌曰客星出入天屏
人民疾疫

客星犯天廁二十三

黃帝占曰客星入天厠天下大饑人相食民移去國君
子賣衣小人賣妻妾一曰賣子而食 黃帝占曰客星
入天厠主病帶下 石氏曰黃白星入天厠天子有喜
奇物見 石氏曰蒼白星入天厠天子有陰病 石氏
曰有星入天厠色青有憂赤有兵白為旱黑為凶 石
氏曰赤星入天厠有內兵起 石氏曰黑星入天厠天
子當之 郝萌曰周伯星流入天厠歲糶大賤民有餘
食以春入夏賤夏入秋賤秋入冬賤冬入春賤終歲同

焉糴無處也 郝萌曰老人星流入天厠為饑以春入
秋饑秋入冬饑冬入春饑 郝萌曰客星入天厠若有
流水水大出 玄冥曰客星出有天厠王者有憂厠中
有謀兵若大人陷厠宜防備之

客星犯天矢二十四

石氏曰客星出天矢而守之天下民多病若多死以五
色占之色黃吉青白疾黑死

客星犯軍市二十五

卷八十四
郝萌曰客星入軍市大饑將離散士卒死亡 荊州占
曰他星守軍市兵起 王歷曰客星出軍市若入守之
軍市中人饑將離散士卒死亡期一年

客星犯狼星二十六

石氏曰客星守狼弧夷狄將來降 郝萌曰客星守狼
弧邦失大臣色赤者得青黑者亡也 荊州占曰客星
守狼星狗大貴 荊州占曰客星守狼星色黃潤有大
喜黑有大憂 荊州占曰客星守狼星有圍城之急以

入日占何國 甘氏曰客星出狼星若守之天下起兵
多盜賊將相多死若有千里之行期一年中二年遠三
年

客星犯弧星二十七

却萌曰客星入弧星將有南夷來降中國者亦為蜀

石氏曰他星守弧野將死 石氏曰客星守弧主將弱

却萌曰客星守弧外夷大饑又曰有兵若弧星張先

起兵者利後起兵者不利 却萌曰客星出弧兵出入

孤兵入 郝萌曰客星舍弧秋雨五穀不成又曰舍弧
左右羣臣有伺其君者 巫咸曰客星出弧若入之其
國有兵大人驚貴人多死士卒出行不出其年

客星犯老人星二十八

石氏曰他星犯老人星天下老者憂兵起 郝萌曰有
星入老人為政不和 黃帝占曰客星出老人星有兵
起老人不安若老人者行若守之久命曰扶老人其國
安老人昌 石氏曰客星入若守老人星天下民疾一

曰兵起老人行

客星犯天稷二十九

石氏曰有星入天稷有祀事於國內出天稷有祀事於國外海中占曰客星守天稷五穀散出其歲憂人民饑一曰守之久社稷不安

客星犯甘氏中官二

客星犯五帝內座一

郝萌曰客星犯紫宮中帝座大臣犯主

客星犯天理二

荊州占曰客星犯天理天下多獄廷尉亦坐之 郝萌

曰有星入天理禁不明 荊州占曰有星入天理大臣有誅者

客星犯內階三

黃帝占曰客星犯守內階奸臣在左右

客星犯天厨四

荊州占曰客星守天厨天下大饑人相食若流亡去其

國君子賣衣小人賣妻又曰食官有食變

客星犯策星五

陳卓曰客星近策星王者不出宮下有謀亂不過七十日

客星犯傳舍六

黃帝占曰客星守傳舍備奸使 雒書摘亡辭曰客星守傳舍邦有憂大使轉粟相食天下苦若自河之東受劒戟之客

客星犯造父七

郝萌曰有星入造父材官騎士出 郝萌曰赤星入造父中車馬貴 黃帝占曰客星守造父兵起 郝萌曰客星守司馬地大動

客星犯人星八

焦延壽曰有星入人星天下有詔符傳相驚

客星犯杵臼九

石氏曰客星守杵臼歲饑民費其財 黃帝占曰客星

守杵曰天下會聚米粟一曰民失杵曰石氏曰有星入杵曰天下有急 郝萌曰有星入守杵曰兵起人聚

客星犯天雞十

天官書曰客星入天雞西北之夷且來下降 郝萌曰客星守天雞雞夜鳴天下盡有驚 荊州占曰客星守天雞山摧若大水

客星犯亢池十一

郝萌曰客星守亢池有盜宗廟者

客星犯天田十二

郗萌曰客星入天田天焦旱五穀不登夕蟲蝗

客星犯天門十三

郗萌曰客星入天門諸相有謀慮

客星犯平道十四

郗萌曰客星守平道諸侯不朝奸人橫行

客星犯酒旗十五

春秋緯曰客星守酒旗飲食失度 荊州占曰客星守

酒旗天下大酺有酒害財物若賜爵宗室

客星犯天高十六

荊州占曰客星入天高有奇令又曰入天高中十日成
勾已有贖罪之令 郝萌曰客星從天高陰出有兵一
曰有走主亡臣從陽入有賜害之殃一曰有客兵入者
郝萌曰客星守天高宮中有火憂有火神從天下若
妖祥自地出

客星犯礪石十七

荊州占曰客星守礪石兵動百工用

客星犯八穀十八

石氏曰客星入八穀天下穀大貴以饑戰主失位

客星犯五潢十九

黃帝占曰客星入五潢兵起車道不通天下大亂易政
一曰貴人死 郗萌曰有星入五潢兵大起 郗萌曰

客星留天潢中人主以水為害若井為害以入日占國

客星犯咸池二十

黃帝占曰客星入咸池大人憂
荊州占曰客星入咸池人君死天下水

客星犯天街二十一

郝萌曰客星入天街內有賊人

客星犯甘氏外官三

客星犯青丘一

荊州占曰客星守青丘土官有事

客星犯車騎二

天官書曰客星入車騎星西羌且來降

客星犯狗國三

韓楊曰客星入狗國其王且操奇物來下中國 却萌
曰客星犯守狗國皆為天下有大道

客星犯天田四

却萌曰有星入天田天下有變

客星犯哭泣五

却萌曰守星守哭泣星人主有哭泣之聲

客星犯八魁六

郝萌曰有星入八魁天下多盜賊

客星犯天溷七

郝萌曰有星入天溷上溺下蒙

客星犯九州殊口八

郝萌曰有星入九州殊口九州之民憂水事 黃帝占

曰客星守九州口負海國不安兵起 郝萌曰客星守

九州口天下凶

客星犯天節九

邾萌曰客星入天節奚契丹有憂 荊州占曰客星守

天節臣有憂

客星犯九游十

荊州占曰客星守九游憂諸侯之兵若禽獸多疾

客星犯軍井十一

荊州占曰客星守軍井軍以水為憂 黃帝占曰客星

入守天井大水

客星犯水府十二

荊州占曰客星守水府江河決溢 却萌曰有星入水

府天下洪水

客星犯天狗十三

黃帝占曰客星入天狗中國多大暴風雨又曰北夷人
饑來降 荊州占曰客星入天狗多土功北夷大饑

荊州占曰客星守天狗守禦之臣作亂

客星犯丈人十四

郝萌曰有星入丈人明臣不得通

客星犯天社十五

黃帝占曰有星入天社有祠事於國內出天社有祠事於國外

客星犯天紀十六

荊州占曰客星守天紀國政亂

客星犯天廟十七

甘氏曰客星犯守天廟軍道不通一曰有兵又曰馬多

死 甘氏曰客星中犯乘守天廟有白衣之會 荊州

占曰客星中犯乘守天廟祠官有憂

客星犯東甌十八

甘氏曰客星入東甌其王且操金玉來下中國

客星犯巫咸中外官四

客星犯天相一

郝萌曰客星出入天相天子變更其令

客星犯長垣二

郝萌曰赤星入長垣胡人大凶

客星犯軍門三

荊州占曰客星犯軍門軍道大通

客星犯陽門四

郝萌曰有星入陽門五兵藏

客星犯鉤星五

荊州占曰客星守鉤星地動

客星犯天桴六

荊州占曰客星守天桴度數改漏刻失時

客星犯天淵七

荊州占曰客星守天淵天下水出地動若海魚出一曰
守三淵水與城等

客星犯天壘城八

郝萌曰客星入天壘城北夷王且操奇馬進中國

客星犯鈇鑕九


黃帝占曰客星入鈇鑕外兵擒殺其將士卒亂傷外國

來降 却萌曰有星入鈇鑕諸侯有來獻地者出鈇鑕則獻地諸侯色青皆以憂赤皆以兵黃皆以好 却萌曰客星入鈇鑕星鈇鑕用以日占其國 却萌曰客星中犯乘鈇鑕皆為兵將憂

客星犯天廡十

黃帝占曰有大星入天廡馬有驚 却萌曰客星入天廡不滿三日馬為之賤 却萌曰有星入天廡廡車出行 却萌曰客星入天廡之中滿三日而去有赦 黃

帝占曰客星出若守天廡有驚戒之事



唐開元占經卷八十四